

ՀԱՅԱՍՏԱՆԻ ՀԱՆՐԱՊԵՏՈՒԹԵԱՆ ԳԵՐԱԳՈՅՆ ԽՈՐՀՐԴԻ

ԴԻՄՈՒՄԸ

ՀԱՅ ԺՈՂՈՎՐԴԻՆ

Ազգային-ազատագրական պայքարի վերջին երեք տարիների վերելքների, վայրէջքների, կորուստների, յոյսերի ու յուսախաբուծիւնների ուղին անցած հայ ժողովուրդը կատարել է ազատ ապրելու իր ընտրութիւնը: Ժամանակը ցոյց է տալիս այդ ընտրութեան ճշմարտացիութիւնը: Ազատութեան մեր ճանապարհը բռնութեամբ փակելու խորհրդային կայսրութեան առաջին փորձը Սումգայիթն էր, որին հետեւեց Բաքուն, այժմ՝ Գետաշէնը: Խորհրդային Միութեան փլուզման ենթակայ բնական ընթացքը բռնութիւններով կանխելու փորձերը շարունակուելու են: Պատմութեան փորձն ու զարգացող իրադարձութիւնները հաստատում են, որ նորանոր ողբերգութիւններից խուսափելու միակ ճանապարհը անկախութիւնն է, դէպի ուր այսօր հաւասարակշիռ ու հաստատուն քայլերով գնում է ժողովրդավարական ուժերի յաղթանակով ստեղծուած մեր ազգային պետութիւնը: Արմատական քայլեր են կատարուել բազմակուսակցական համակարգի, սեփականութեան տարբեր ձեւերի, ժողովրդավարութեան հաստատման ուղղութեամբ, եւ ժամանակը կը գնահատի դրանք:

Բնական է, որ մոսկովեան կենտրոնական իշխանութիւնները սադրանքներով պէտք է փորձեն կոտրել իրաւական ճանապարհով դէպի անկախութիւն գնացող հայ ժողովրդի կամքը, բռնութիւններ գործադրելով Արցախում, Գետաշէնում, Շահումեանում, ազգամիջեան ընդհարումներ իրահրելով Ադրբեջանի հետ սահմանակից շրջաններում: Այդ նպատակով Խորհրդային Միութիւնն օգտագործում է ոչ միայն Ադրբեջանի կոմունիստական վարչակարգը, այլեւ բանակը:

Փորձը ցոյց է տուել, որ ճակատագրական պահերին մեր ժողովուրդն անելի է համախմբում, դառնում առաւել վճռական, նա գիտակցում է, որ այդ ճանապարհին կունենայ բազում զրկանքներ, բայց հասկանում է նաեւ, որ նահանջը ընտրած ուղուց ոչ միայն կը բազմապատկի զրկանքները, այլեւ անդամնալի կորուստներ կը բերի:

Ազգային նպատակի իրագործման կարելորագոյն իրամայականն է բոլոր քաղաքական ուժերի եւ սոցիալական խմբերի համախմբուածութիւնը հայոց պետականութեան շուրջը:

Այս ճգնաժամային պահին ներքին անկազմակերպուածութիւնը, խուճապը, խմբային ու կուսակցական եսակենտրոն նկրտումները կարող են ապակայունացնել իրադրութիւնը եւ հարուածել Հայաստանի պետականութեանը:

Հայաստանի Հանրապետութեան Գերագոյն Խորհուրդն ու կառավարութիւնը հաստատակամ են իրենց ընտրած ազգային քաղաքականութեան մէջ եւ վճռականօրէն կը կանխեն ազգային շահերի ու պետականութեան դէմ ուղղուած ցանկացած գործողութիւն ու սադրանք:

Հայաստանի Հանրապետութեան Գերագոյն խորհուրդը, վստահ հայ ժողովրդի հաստատակամութեանն ու իմաստնութեանը, մեր պատմութեան այս շրջադարձային պահին նրան է դիմում հայոց պետականութեան շուրջ համախմբուելու կոչով, գիտակցելով, որ դա է մեր ազգային իղձերի իրականացման հաստատ երաշխիքը:

6 Մայիսի, 1991 թ.